

समे – 12:25 hrs.

<><><><><><>

PM-Mauritius

प्रधानमंत्री नरेंद्र मोदी होर अज्ज मारीशस दे राश्ट्रीय दिवस समारोह च मानजोग परोहने दे तौरा पर शिरकत करंगन। एह दुई बारी ऐ जदूं प्रधानमंत्री मोदी इस कार्यक्रम च शिरकत करै करदे न। समारोह च भारतीय फौज दा पैदल दस्ता, भारतीय वायु सेना दी आकाश गंगा स्काई डाइविंग टीम ते भातीय नोसे दा इक बेड़ा “इम्फाल” बी मारीशस दे राश्ट्रीय ध्याड़े दे समारोह च हिस्सा बनडन। जियां जे पैहले बी खबर दिती जाई चुकी दी ऐ जे 2 रोजा मारीशस दौरै पर गेदे प्रधानमंत्री होरें गी उत्थूं दी सरकारें अपने सब्भनें शा बड़्डे सिविल अवार्ड “ग्रेंड कमांडर ऑफ द आर्डर ऑफ दा स्टार” कन्नै सम्मानित कीता ऐ।

<><><><><><>

Centre-Ban

केंद्री गृह मंत्री अमित शाह होरें आखेआ ऐ जे मुल्खै दी सुरक्षा ते शांति लेई खतरा पैदा करने आहले कुसै बी व्यक्ति या संगठन गी बखशेया नेई जाग ते ओहदे खलाफ सख्त कार्रवाई कीती जाग। अपने इक सोशल मीडिया हैंडल पर जम्मू-कश्मीर च दो संगठनें पर लाई गेदी पाबंदी दी तस्दीक करदे होई उनें एह गल्ल आक्खी। जियां जे पैहले बी एह खबर दिती जाई चुकी दी ऐ। सरकार नै दो आतंकवादी गुटें, अवामी एक्शन कमेटी (AAC) ते जम्मू-कश्मीर इतिहाद उल मुसलमीन (JKIM) पर पाबंदी लाई दिती ऐ। गृह मंत्रालय नै गैर कनूनी गतिविधिं पर रोक लाने सरबन्धी कनूनी यू.ए.पी.ए 1967 तैहत इनें दौनें संगठनें गी गैर कनूनी घोषित करी दिता ऐ। केंद्र सरकार नै मीरवाइज उमर फारूक दी अगुवाई आहली अवामी एक्शन कमेटी ते मसरूर अब्बास अंसारी दी अगुवाई आहली जम्मू कश्मीर इतिहाद उल मुसलमीन पर 5 बरें दी पाबंदी लाई दिती ऐ। आकाशवाणी जम्मू संवाददाता दी रिपोर्ट मूजब गृह मंत्रालय नै 2 बक्ख-बक्ख अधिसूचनाएं च इनें संगठनें दे भारत दी संप्रभुता, अखंडता ते सुरक्षा गी खतरा पजाने आहली गतिविधिं च शामिल होने दा हवाला दिंदे होई एह कार्रवाई कीती ऐ। अवामी एक्शन कमेटी ते ओदे नेताएं खलाफ कई सारे आपराधिक मामले दर्ज कीते गेन जिंदे च देशद्रोह, गैर कनूनी

सभा, हिंसा भड़काने ते कथित तौर पर भारत सरकार खिलाफ भाषण देने, चुनां दा बहिष्कार ते विरोध प्रदर्शन गी बढ़ावा देने दा आरोप शामिल ऐ।

<><><><><><>

CD-Fund

जम्मू-कश्मीर सरकारै हल्का विकास फंड स्कीम तैहत हर इक विधायक लेई सलाना 3 करोड़ रपे दी रकम मंजूर कीती ऐ। आकाशवाणी दे जम्मू सांवददाता ने जानकारी दिती ऐ जे एहदे नै विधायकें गी अपे अपने हल्के च महत्वपूर्ण विकास परियोजनाएं गी असरदार ढंगै सिर तोड़ चाढ़ने च सखाल होग। खजाना विभाग नै हल्का विकास फंड स्कीम गी लागू करने बारे दिशा-निर्देशें ते नियमें बारै इक तफसीली सर्कुलर जारी कीता ऐ। इनें दिशा-निर्देशें मूजब कोई बी विधायक सलाना 3 करोड़ रपे दे विकास कम्में दा प्रस्ताव, जिला विकास कमिशनर अगगे रक्खी सकदा ऐ।

<><><><><><>

PM-Dandi March

प्रधानमंत्री नरेंद्र मोदी होरें अज्ज उनें सब्भनैं लोकें गी श्रद्धांजलि भेंट कीती ऐ जेड़े ऐतिहासिक डांडी मार्च च शामिल होए हे। एह् मार्च 1930 च अज्जै दे रोज महात्मा गांधी हुंदी अगुवाई च शुरू होई ही जिसी नमक सत्याग्रह दे नां कन्नै बी जानेआ जंदा ऐ। एह् इक शांतिपूर्ण आंदोलन हा जेदा मकसद अंग्रेजें आसेआ लून पर लाए गेदे टैक्स खिलाफ विरोध दर्ज कराना हा। महात्मा हुंदे कन्नै 78 आश्रमवासिएं बी एहदे च शिकरत कीती ही। 24 दिनें तोड़ी चली दी एह् जातरा 6 अप्रैल 1930 गी गुजरात दे दांडी नां दे ग्रां च समुद्र दे कंडे जाइयै सम्पन्न होई ही। जित्थे गांधी जी ते उन्दे समर्थकें समुंद्र दे पानी नै लून बनाइयै अंग्रेजें दे नमक कनून दी खिलाफवर्जी दर्ज कराई ही।

<><><><><><>

Pakistan Train

पाकिस्तान सुरक्षा बलें बलूचिस्तान च अगुवाह कीते गेदे रेल यात्रिएं चा 104 गी बचाई लैता ऐ। इस कार्रवाई दौरान 16 आतंकवादिएं दे मारे जाने दा बी दावा कीता गेआ ऐ। जियां जे पैहले बी खबर दिती जाई चुकी दी ऐ जे बलूचिस्तान लिबरेशन आर्मी दे आतंकवादिएं कल

क्वेटा थमां पेशावर जारदी जाफर एक्सप्रेस जेदे च पाकिस्तानी फौजिएं समेत कोई 500 लोक सवार हे, गी अपने कब्जे च लेई लैता हा। तोआई बीएलए दा आखना ऐ जे उनें 104 लोकें गी आपूं छोड़या ऐ नां कि पाकिस्तानी फौज नै कार्रवाई च उनेंगी बचाया ऐ।

<><><><><><>

Gabbard-India Visit

अमरीका दी राष्ट्रीय खूफिया निदेशक तुलसी गबार्ड, हिंद प्रशांत खेतर दे देसें दी जातरा दे सिलसिले च भारत दा दौरा करंगन। उनें आखेआ जे एह इस जातरा दा उद्देश्य अमरीका दे राष्ट्रपति डोनाल्ड ट्रम्प हुंदे रमानदारी ते सुतंत्रता दे उद्देश्यें गी हासल करने लेई सरबंधें गी मजबूत बनाना ऐ। उंदियां मलाटियां प्रधानमंत्री मोदी ते राष्ट्रपति डोनाल्ड ट्रम्प हुंदी खुफिया जानकारी सांझी करने दी बचनबद्धता गी अगड़े बधाने लेई होंगन। अगले हफ्ते ओह नमीं दिल्ली च भू राजनैतिक सुरक्षा सम्मेलन, रासीना डायलाग च हिस्सा लैंगन जेदे लेई प्रधानमंत्री मोदी होरें उनेंगी पिछले महीने वाशिंगटन च मलाटी दौरान साद्दा दिता हा।

<><><><><><>

ADC-Jammu

जम्मू दे ए.डी.सी राकेश कुमार होरें खाद्य सुरक्षा ते लोकें दी सेहत दी हिफाजत ते उसी बढ़ावा देने दे जत्नें तैहत कार्रवाई करदे होई कई सारे इदारे पर म्यारी चीजां नेई बेचने लेई खाद्य सुरक्षा ते मानकें सरबन्धी कनून तैहत कार्रवाई करदे होई 3 लख 64 जहार रपे दा जुर्माना आयत कीता ऐ। अधिकारिक जानकारी मूजब एह जुर्माना उत्पादकें वितरक ते परचून विक्रेताएं पर लाया गेआ ऐ। सारे कारोबारी इदारे गी हिदायत कीती गई ऐ जे ओह पूरी ईमानदारी कन्ने नियमें दी पालमा करन ते खाद्य सुरक्षा गी यकीनी बनान तां जे कुसै बी चाल्ली दी कनूनी कार्रवाई थवां बचेआ जाई सकै।

<><><><><><>